

Yommuu Sodaas fi Rakkoon Cimaa-Kutaa 8

Description

Sodaas fi Rakkoon Booda Gargaarsi fi Injifannoonaan yommuu dhufu

Hanga ammaatti duula Khandaq/Ahzaab keessatti sodaas fi rakkoon cimaa Muslimoota muudate ilaalaat turreera. Wanta qormaata kanarraa barbaadamee fi haala namootaas hubanne jirra. Kuni nuuf barnoota guddaa ta'a. Amma gara xumuraatti dhufaa jirra. Qormaata sodaatii fi rakkoon booda gargaarsi fi injifannoonaan ni dhufa. Kunoo qormaata cimaa san booda gargaarsi fi injifannoonaan ni dhufe:

وَرَدَ اللَّهُ أَلَّذِينَ كَفَرُواْ بِغَيْظِهِمْ لَمْ يَنَالُواْ أَخْرَى وَكَفَى اللَّهُ أَمْوَالُ الْمُؤْمِنِينَ
الْقِتَالُ وَكَاتَ اللَّهُ قُوَّيْاً عَزِيزًا

﴿٢٥﴾

“Rabbiin kanneen kafaran dallansuu isaaniitiin deebisee, kheeyri homaatu hin arganne. Lola keessatti Rabbiin mu’mintootaaf ni gahe. Rabbiin Jabaa, Injifataa ta’era.” Suuratu Al-Ahzaab 33:25

Rabbiin subhaanahu wa ta’alaa akkamitti garee diinaa gamtooman (ahzaaba) bubbee fi hoomaa malaaykotaa itti erguun Madiinaa irraa deebisee nutti hima. Ossoo Rabbiin Ergamaa Isaa addunyaa guutuuf rahmata gochuu baatee, silaa bubeen tuni bubbee gogduu ummata Aad irratti erge caalaa isaan irratti cimtu taati turree. Garuu Rabbiin olta’aan ni jedhe:

وَمَا كَانَ اللَّهُ لِيُعَذِّبَهُمْ وَأَنَّتَ فِيهِمْ

“Ati ossoo isaan keessa jirtuu Rabbiin kan isaan adabu miti.” (Suuratu Al-Anfaal 8:33)

Akkuma sababni tokkummaa isaanii fedhii lubbuu qullaat ta’e, bubbee tokkummaa isaanii bittineessitu isaanitti erge. Isaan gosoota fi gartuu garagaraa irraa yaada garagaraatin kan walitti makamaniidha. Kanaafu, bubeen gamtoominna isaanii bittineessitu, dallananii fi kasaaranii akka deebi’an isaan taasistu isaanitti erguun wanta maluudha.

Gareen gamtooman kunniin dallansuun guuttamanii deebi'an. Akkasumas, "**kheeyri homaatu hin arganne.**" Kan jechuun wanta gaarii addunyaa irraa hawwan kan akka injifannoo fi boojii hin arganne. Ammas, Aakhiratti wanta gaarii hin arganne. Sababni isaas, Ergamaa Rabbiitti (SAW) lola banuu, isa ajjeesuu fi lola isaa balleessuuf yaada (niyyaa) qabu turan. Namni wanta tokko yaade fi yaada isaa hojiin dhugoomse, inni dhugaadhaan akka nama wanta san hojjateeti.

“Lola keessatti Rabbiin mu’mintootaaf ni gahe.” Mu’mintoonni garee gamtooman biyya isaanii keessaa baasuuf isaaniin lolutti hin hajamne. Kana irra, Rabbiin tokkichi ni gahe, gabricha Isaa ni gargaare, loltu Isaa ni jabeesse. Kanaafi, Ergamaan Rabbii (SAW) akkana jechaa turan: “

“Rabbii tokkicha malee haqaan gabbaramaan hin jiru. Loltu Isaa ni jabeesse, gabricha Isaa ni gargaare, Kophaa Isaa garee diinaa gamtooman ni moo’ate, Isa booda homtu hin jiru.” [Sahih Muslim 2724](#)

Sahih al-Bukhaari fi Muslim keessatti Abdullaah ibn Abi Awfaa radiyallahu anhu ni jedhe: Guyyaah Ahzaab Ergamaan Rabbii sallallahu aleih wassallam Ahzaaba irratti akkana jechuun du'aayi godhe:

“Yaa Rabbii Buusaa Kitaabaa, qorachuutti saffisaa Kan taate, Ahzaaba moo’i (injifadhu), Yaa Rabbii isaan moo’i, isaan sochoosi.” Sahih Muslim 1742

“Lola keessatti Rabbiin mu’mintootaaf ni gahe.” Aayan tuni akka agarsiisutti isaan (Muslimootaa) fi Qureeshota jidduu lolli akka dhaabbate agarsiisti. Mushrikoonni Muslimoota irratti hin duulle. Kana irra, Muslimootatu biyya isaanii keessatti itti duule. Akkuma Imaamu Ahmad, Suleymaan bin Surad (radiyallahu anhu) irraa gabaasetti, Ergamaan Rabbii (sallallahu aleyh wassallam) guyyaa Ahzaab ni jedhan: “**Ammaan [booda] nutu isaanitti duulaa malee isaan nutti hin duulan.**” [Sahih Al-Bukhaari](#)

“Rabbiin Jabaa, Injifataa ta’eera.”

Dandeetti fi humna Isaatiin kan kasaaran ta'anii duubatti isaan deebise. Waan gaarii homaatu hin arganne. Rabbiin Islaamaa fi hordoftoota isaa ni jabeesse, waadaa Isaa ni guute, Ergamaa fi Gabricha Isaa ni gargaare, faaruu fi tolli hundi kan Isaati.^[1]

Wanta aaya tana irraa baratamu keessaa tokko: Rabbiin azza wa jalla mu'mintoota irraa balaa ni ittisa. Ragaan kanaa: "**Lola keessatti Rabbiin mu'mintootaaf ni gahe.**" Aayah tana keessatti: mu'mintoota addatti baase. Kuni kan agarsiisu sababa iimaana isaanitiif isaaniif gahaa ta'e. Mu'mintonni wanta isaan yaachisu keessatti Rabbiin subhaanahu wa ta'aalaa isaaniif gahaadha, sababa iimaana isaanitiif isaan irraa ittisa. Akkuma Rabbiin olta'aan jedhe:

وَيُنْجِي اللَّهُ الَّذِينَ أَتَقْوَا بِمَفَازَتِهِمْ لَا يَمْسُهُمُ السُّوءُ وَلَا هُمْ

يَحْزَنُونَ 

“Rabbiin warra Isa sodaatan milkii isaanitiin isaan baraara. Hamtuun isaan hin tuqu, isaan hin gaddanis.” Suuratu Az-Zumar 39:61[2]

Kanaafu, iimaana sirrii qabaachun eeggumsa Rabbii olta’aa akka argatan nama taasisa. Namni eeggumsa Isaa argate rakkoo fi yaaddo cimaa keessaa baha. Tarii addunyaa tana keessatti rakkoon mu’mintti (Muslima dhugaan amanetti) ni bu’a. Garuu kuni qormata waan ta’eef issaaf gaariidha. Isa qulqulleessuun sadarkaa isaa olkaasa. Marsaalee jirenyaa afran keessatti rakkoon hundarra cimaan nama tuqu marsaa jirenyaa afraffaa irratti. Suni Guyyaa Qiyaamaati. Kanaafi, aayah armaan olii tana keessatti Guyyaa Qiyaamaa namoota Isatti amanaii fi sodaatan rakkoon kan isaan hin tuqnee fi hin gaddine ta’uu ibse. Kanaafu, wanta badaa fi gaddisiisaa irraa isaan akka eegu waadaa galeef. Rakkoon addunyaa tanaa ni darba. Rakkoon Guyyaa Qiyaamaa hoo?

Guduunfaa

Wanta darbe irraa yommuu saamsinu: Qormata keessa darbuuf wantoonni kunniin barbaachisoodha: ?Iimaana-hala sirrii ta’een Rabbii olta’aatti fi haqa Isarraa dhufetti amanuu.

?Addunyaan iddo qormata ta’uu beekun Rabbiin subhaanahu akka nama qoru mirkanefachu. ?Namoota qoruun waadaa Isaa akka ta’e amanuun murtii Isaatiif harka kennu fi Isaaf ajajamu. Rabbiin subhaanahu wa ta’alaa namoota akka qoru Qur’aana keessatti irra deddeebi’uun waadaa gale jira. ?Wantoota yeroo qormataa namarrah eeggaman hojjachu. Isaanis: Obsuu, wanta shari’aan itti ajaje hojjachuu fi wanta irraa dhoowwe dhiisu, rakkoo booda gargaarsi Rabbii akka dhufuu abdachuu, tawbachuu, araarama kadhachuu fi kkf.

?Waa’ee Rabbii subhaanahu wa ta’alaa ilaachise yaada badaa yaadu irraa of qu sachuu. Tuqaan tuni tuqaa ijoo fi jabduu taatedha itti xiyyefadhu. Mee wanta imaamu Ibn Al-Qayyim jedhe haa dhiyeessinu: Qur’aana keessatti Rabbiin ilaachisee yaada badaa nama yaadetti zaatu (adabbiin issaaf waadaa galu) caalaa zaachan guddaan hin dhufne. Rabbiin olta’aan ni jedha:

وَيُعَذِّبُ الْمُنَفِّقِينَ وَالْمُنَفَّقَاتِ وَالْمُشْرِكِينَ وَالْمُشْرِكَاتِ
الظَّانِينَ بِاللَّهِ ظَنَّ الْسَّوْءِ عَلَيْهِمْ دَآئِرَةُ الْسَّوْءِ وَغَضَبُ اللَّهِ
عَلَيْهِمْ وَلَعْنَهُمْ وَأَعَدَ لَهُمْ جَهَنَّمَ وَسَاءَتْ مَصِيرًا 

“Munaafiqoota dhiiraatii fi dubartii, mushrikoota dhiiraatii fi dubartii, Rabbiin ilaachisee yaada badaa yaadan adabuuf [injifannoo ifa ta’e si goonfachiifne]. Isaan irra marsaa badaatu jira. Rabbiin isaan irratti dallanee, isaan abaaree fi Jahannamiin isaaniif qopheesse jira. Gahuumsi waa fokkatte.”

Suuratu Al-Fathi 48:6 (Munaafiqonni fi mushrikoonni Rabbiin Ergamaa Isaatii fi mu'mintoota isa waliin jiran hin gargaaru, Islaama ifatti hin baasu jechuun waa'ee Rabbii ilaachise yaada badaa yaadan. Kanaafu, gargaarsaa fi injifannoo guddaa Nabiyyiif gochuun yaada badaa isaanii ni fashaleesse.)

“Namoonni baay’een wanta isaan qofaan wal qabatu keessatti ta’i, wanta namoota biroo irratti hojjatamu keessattis ta’i, waa’ee Rabbii ilaachisee yaada badaa yaadu. Nama Rabbiin, maqaalee fi amaloota Isaa beekee malee kanarraa nagaha kan ta’u hin jiru. Namni qaruuten nafsee ofiitiif dhugaa ta’e, kanatti xiyyeefannoo haa kenu. Rabbii isaa ilaachisee yaada badaa yaadu irraa gara Rabbiitti haa tawbatu (haa deebi’u), araarama haa kadhatu.”[3]

[1] Al-Misbaahu Al-Muniir fii zahziib Tafsiir Ibn Kasiir-1123-1124

[2] Tafsiiru Al-Qur'aanil Kariim-Suuratu Al-Ahzaab-Ibn Useymiin-fuula 192

[3] Fatihul Majiid Sharif Kitaabu Tawhiid-fuula 778

“Nawaqidul Imaani al-qawliyah wal amalayah” fuula 124-Abdulaziz bin Muhammad

Date Created

April 15, 2020

Author

admin